



MARKAS ANGKATAN TENTERA MALAYSIA
BAHAGIAN HAL EHWAL AWAM-J7
Wisma Pertahanan
Jalan Padang Tembak
50634 KUALA LUMPUR
Tel: 03-20716425/6424
Laman Web: www.mafhq.mil.my

SIARAN AKHBAR

KAPIT

16 MEI 21 (AHAD)

(Dikeluarkan pada jam 10.00 pagi)

KERJASAMA ATM DAN KKM TERUS DIPERTINGKAT SEBILANG MASA

KAPIT, 16 Mei 21 - Panglima Angkatan Tentera, Jeneral Tan Sri Dato' Sri Haji Affendi bin Buang TUDM menyatakan kerjasama Angkatan Tentera Malaysia (ATM) dan Kementerian Kesihatan Malaysia (KKM) dalam menghadapi gelombang peringkat ke-3 penularan pandemik COVID-19 kini akan dipertingkatkan sebilang masa. Ini juga merupakan komitmen ATM dalam tugas-tugas sekunder bagi memastikan kesejahteraan dan kesihatan rakyat sentiasa menjadi keutamaan.

Beliau menyatakan perkara ini ketika mengadakan lawatan kerja singkat beliau hari ini ke Hospital Medan ATM Kapit yang telah beroperasi sejak 10 Mei lalu di Dewan Masyarakat Melayu Kapit.

Beliau turut menyatakan bahawa kemudahan logistik semasa dalam membawa bantuan perubatan dan peralatan kesihatan juga akan diteruskan dengan menggunakan aset ATM mengikut keperluan terutamanya penghantaran udara yang melibatkan pesawat Tentera Udara Diraja Malaysia (TUDM). Penubuhan hospital medan di lain-lain lokasi juga adalah tertakluk kepada keperluan semasa dan kemampuan sedia ada yang dapat disediakan oleh Bahagian Perkhidmatan Kesihatan ATM.

Dalam situasi COVID-19 terkini, beliau juga mengharapkan agar setiap lapisan masyarakat memberikan kerjasama dan mematuhi arahan serta SOP yang telah dikeluarkan oleh Kerajaan bagi memastikan rantaian pandemik COVID-19 ini dapat diputuskan demi kesejahteraan semua.

Perkhidmatan Kesihatan ATM melalui Kor Kesihatan Diraja (KKD) telah mengatugergerak petugas dan kelengkapan Hospital Medan ATM ke Kapit pada 06 Mei 21 lalu. Hospital ini adalah hospital kedua seumpamanya didirikan selepas kejayaan mengoperasikan konsep hospital yang sama di Tawau, Sabah.

Melalui aturgerak pasukan Batalion Pertama Perubatan yang berpangkalan di Kem Muara Tuang, Kota Samarahan dengan kerjasama Jabatan Kesihatan Negeri Sarawak dan Hospital Kapit, hospital medan ini berperanan menyediakan rawatan kepada pesakit selain kes - kes COVID-19. Hospital berkapasiti 40 buah katil ini turut dilengkapi dengan kemudahan wad, farmasi, x-ray dan bilik rawatan kecemasan. Melalui kemudahan yang disediakan ini, ia akan membolehkan Hospital Kapit memberi tumpuan kepada perkhidmatan rawatan kes COVID-19 di samping mempunyai kapasiti katil yang mencukupi bagi pesakit wabak berkenaan dan kes yang lebih serius.

Pengoperasian Hospital Medan ini juga adalah 24 jam sehari, tujuh (7) hari seminggu dan antara rawatan yang dilaksanakan termasuklah perkhidmatan rawatan pesakit dalam (12 jam sehari mengikut shif bagi pertugas klinik) dan perkhidmatan bahagian pentadbiran dan sokongan (jam 7 pagi hingga 4 petang).

Sejak hari pertama menerima pesakit pada 10 Mei 21 sehingga 14 Mei 21, seramai 7 pesakit telah ditempatkan di hospital ini dan seorang daripada mereka telah dibenarkan keluar. Pada masa kini jumlah pesakit semasa adalah seramai 6 orang.

Pada ketika ini kes pembedahan belum lagi dilaksanakan di hospital berkenaan. Walau bagaimanapun, keupayaan hospital ini boleh dipertingkatkan dengan perkhidmatan dewan bedah dan unit rawatan rapi (ICU) jika ada keperluan semasa.

Sehingga kini, ATM telah menempatkan 6 pegawai termasuk Lt Kolonel (Dr) Saiful Anuar bin Ju @ Ju Ahmad sebagai Komander Hospital Medan berkenaan. Jumlah pegawai ini adalah terdiri daripada 3 Pegawai Perubatan, 1 Pegawai Tugas Khas, 1 Pegawai Tadbir serta 53 anggota terdiri daripada 32 paramedik dan 21 anggota perkhidmatan sokongan. Manakala KKM terdiri daripada 10 jururawat dan 6 anggota perkhidmatan sokongan. Keseluruhannya, ATM dan KKM menempatkan petugas seramai 6 pegawai dan 69 anggota/staf di hospital medan berkenaan.

Mengambil kesempatan lawatan kerja singkat ini, dan sempena sambutan Aidilfitri, Panglima Angkatan Tentera turut menyampaikan sumbangan Hari Raya untuk para petugas kesihatan di hospital berkenaan.

Turut sama dalam lawatan kerja ini adalah Panglima Tentera Darat, Jeneral Tan Sri Datuk Zamrose bin Mohd Zain, Ketua Pengarah Perkhidmatan Kesihatan ATM, Leftenan Jeneral Dato' (Dr) Zulkeffeli bin Mat Jusoh, Panglima Medan Timur Tentera Darat, Leftenan Jeneral Dato' Mardzuki bin Muhammad dan Panglima 1 Divisyen, Mejar Jeneral Dato' Dzulkafli Hj Mustafa.

-TAMAT-

"KEDAULATAN NEGARA TANGGUNGJAWAB BERSAMA

